



**SURUHANJAYA PILIHAN RAYA MALAYSIA**

## **KENYATAAN MEDIA**

**Bil. 13/2021**

### **URUSAN PILIHAN RAYA UMUM DEWAN UNDANGAN NEGERI (PRU DUN) MELAKA YANG KE-15**

1. Suruhanjaya Pilihan Raya Malaysia (SPR) telah menerima pemakluman rasmi daripada Speaker Dewan Undangan Negeri (DUN) Melaka, berhubung dengan pembubaran DUN Melaka penggal yang keempat belas pada 4 Oktober 2021 sebagaimana termaktub di bawah Fasal (2) Perkara 19 Perlembagaan Negeri Melaka.
  
2. SPR telah mengadakan Mesyuarat Khas pada hari ini dan menetapkan bahawa satu Pilihan Raya Umum Dewan Undangan Negeri (PRU DUN) Melaka ke-15 perlu diadakan dalam tempoh 60 hari dari tarikh pembubaran pada **5 Oktober 2021** bagi mengisi kekosongan 28 kerusi DUN berkenaan.
  
3. Bagi maksud menjalankan PRU DUN Melaka ke-15 ini, SPR telah menetapkan tarikh-tarikh penting seperti yang berikut :

<b>Tarikh Keluar Writ</b>	<b>: 18 Oktober 2021 ( Isnin )</b>
<b>Hari Penamaan Calon</b>	<b>: 8 November 2021 ( Isnin )</b>
<b>Hari Mengundi Awal</b>	<b>: 16 November 2021 ( Selasa )</b>
<b>Hari Mengundi</b>	<b>: 20 November 2021 ( Sabtu )</b>

4. Tempoh berkempen ditetapkan **12 hari** bermula selepas pengisytiharan calon-calon yang bertanding pada **8 November 2021 (Isnin)** sehingga pukul **11.59 malam, 19 November 2021 (Jumaat)**.
  
5. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

<b>Tarikh Buka</b>	:	<b>20 Oktober 2021 (Rabu)</b>
<b>Tarikh Tutup Kategori 1A (Petugas Pilihan Raya, Ahli/Pegawai SPR, Anggota Polis, Anggota Tentera, dan Petugas Media)</b>	:	<b>3 November 2021 (Rabu)</b>
<b>Tarikh Tutup Kategori 1B (Pengundi Luar Negara)</b>	:	<b>1 November 2021 (Isnin)</b>
<b>Tarikh Tutup Kategori 1C (9 Agensi dalam Sektor Keselamatan &amp; Kesihatan)</b>	:	<b>1 November 2021 (Isnin)</b>

6. Permohonan undi pos untuk **kategori 1B (Pengundi Luar Negara)** dan **Kategori 1C (9 Agensi dalam Sektor Keselamatan & Kesihatan)** bagi tujuan PRU DUN Melaka Ke-15 akan dilaksanakan **secara dalam talian (online)** berbanding secara *manual* sebelum ini.
  
7. Pemohon perlulah **mendaftarkan akaun di MySPR Daftar terlebih dahulu** sebelum memohon sebagai pengundi pos. Permohonan untuk mengundi secara pos ini boleh dilakukan melalui MySPR Daftar di pautan <https://mysprdaftar.spr.gov.my>.

8. Syarat-syarat kelayakan pengundi pos Kategori Luar Negara seperti yang dilaksanakan sebelum ini **telah dimansuhkan**, iaitu:
  - i. Bermastautin di luar negara kecuali di Wilayah Selatan Thailand (Narathiwat, Pattani, Yala, Songkhla dan Satun), Singapura, Brunei dan Kalimantan, Indonesia; dan
  - ii. Pernah berada di Malaysia atau kembali ke Malaysia tidak kurang daripada 30 hari dalam tempoh 5 tahun sebelum tarikh pembubaran Dewan Undangan Negeri yang sedang berkuat kuasa.
9. Pemohon dinasihatkan agar **memohon lebih awal apabila tarikh permohonan dibuka** bagi mengelakkan berlakunya sebarang isu atau kesulitan.
10. Bagi menjalankan proses PRU DUN Melaka ke-15, SPR telah melantik **28 orang Pegawai Pengurus Pilihan Raya** dibantu oleh **80 orang Penolong Pegawai Pengurus**. Manakala bagi tujuan memantau semua aktiviti kempen pilihan raya sepanjang tempoh rasmi berkempen, SPR juga menubuhkan **28 Pasukan Penguat Kuasa Kempen Pilihan Raya (PP-KPR)**. Pasukan PP-KPR ini akan dianggotai oleh wakil-wakil daripada pihak Polis Diraja Malaysia (PDRM), Pihak Berkuasa Tempatan (PBT) dan wakil-wakil calon yang bertanding.

11. Bagi maksud PRU DUN Melaka ke-15, sebanyak **28 Pusat Penamaan Calon (PPC)** dan **28 Pusat Penjumlahan Rasmi Undi (PPRU)** akan digunakan.
12. Untuk memudahkan proses penamaan calon, SPR menyeru kepada bakal-bakal calon yang ingin bertanding dalam PRU DUN Melaka ke-15, agar mengisi dan membuat semakan awal pengisian borang tersebut dengan Pejabat Pegawai Pengurus atau Pejabat Pilihan Raya Negeri Melaka sebelum Hari Penamaan Calon. Selain itu, bakal-bakal calon juga adalah digalakkan untuk membuat pembayaran deposit lebih awal. Ini bertujuan untuk memastikan semua proses penamaan calon dapat diselesaikan lebih awal dan berjalan lancar.
13. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak oleh Pejabat Pegawai Pengurus itu hendaklah dikemukakan oleh calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.
14. SPR akan meneruskan penyiaran secara langsung proses-proses pilihan raya menerusi live streaming bagi DUN yang terpilih di laman *Facebook* SPR sebagaimana yang dilaksanakan pada pilihan raya sebelum ini.
15. Seramai **12,290 orang petugas** akan dilantik bagi mengendalikan proses PRU DUN Melaka ke-15. Manakala, sebanyak **217 buah pusat mengundi biasa** yang mengandungi **1,109 tempat mengundi/saluran** dan **31 pusat mengundi awal** bagi

**pengundian yang mengandungi 47 tempat mengundi/saluran awal** akan digunakan. Keseluruhan jumlah pusat mengundi adalah sebanyak **248 buah dengan 1,156 tempat mengundi/saluran**. PRU DUN Melaka ke-15 ini dianggarkan memerlukan peruntukan sebanyak **RM46 juta**.

16. Semua **217 buah pusat mengundi biasa** pada Hari Mengundi akan **dibuka** dari jam **8.00 pagi hingga 5.30 petang**. Bagi pusat **mengundi awal**, **21 buah pusat** mengundi akan **dibuka** dari jam **8.00 pagi hingga 2.00 petang** dan baki **10 buah pusat mengundi awal** akan **dibuka** dari jam **8.00 pagi hingga 5.30 petang**.
17. **Daftar Pemilih Pilihan Raya (DPPR)** yang akan digunakan untuk PRU DUN Melaka ke-15 ini adalah **Daftar Pemilih terkini sehingga Daftar Pemilih Tambahan (DPT) ST2/2021** yang dikemaskini sehingga **3 Oktober 2021**. Daftar Pemilih tersebut mengandungi **495,196 orang pengundi** yang terdiri daripada **482,550 orang pengundi biasa**, **10,191 orang anggota tentera dan pasangan**, **2,349 orang anggota polis** dan **106 orang Pengundi Tidak Hadir (PTH) Luar Negara**. DPPR tersebut akan mula dijual pada **3 November 2021 (Rabu)**.
18. Para pengundi boleh membuat **semakan Daftar Pemilih** untuk mengetahui maklumat pusat mengundi, saluran mengundi dan nombor bilangan mereka melalui laman portal SPR **pengundi.spr.gov.my** atau menelefon ke talian **03-88927018** atau melalui aplikasi **MySPR Semak**.

19. SPR turut menawarkan kepada mana-mana agensi Kerajaan, Pertubuhan Bukan Kerajaan (NGO), mana-mana badan atau individu berkelayakan yang berminat untuk menjadi pemerhati pilihan raya bagi melihat perjalanan proses PRU DUN Melaka ke-15 bermula pada hari mengundi sehingga keputusan pilihan raya diumumkan. Mereka dibenarkan untuk membuat pemerhatian seperti di pusat-pusat mengundi, tempat pengiraan undi dan pusat penjumlahan rasmi undi sahaja serta perlu mematuhi kesemua syarat-syarat pelantikan yang telah ditetapkan oleh SPR.
20. Permohonan untuk menjadi Pemerhati Pilihan Raya boleh dikemukakan kepada SPR melalui e-mel **pemerhati@spr.gov.my** mulai hari ini, **18 Oktober 2021** dan **tarikh tutup** adalah pada **25 Oktober 2021 ( Isnin )**.
21. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `**Jom Kita Undi**` melalui pelbagai saluran media termasuk di media elektronik, media sosial, hebahan melalui siar raya dan pemasangan kain rentang di lokasi-lokasi strategik tumpuan awam dan tempat-tempat lain yang bersesuaian.
22. SPR menyasarkan **70 peratus pengundi** akan keluar mengundi. SPR juga memohon kerjasama semua pihak termasuk pihak media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi.
23. SPR juga akan meneruskan penambahbaikan seperti berikut:

- a. Menyediakan saluran khusus bagi pengundi yang berumur 60 tahun dan ke atas di setiap Pusat Mengundi;
  - b. Memanjangkan tempoh masa pengundian selama 30 minit dari jam 8.00 pagi hingga 5.30 petang berbanding pada PRU-14 iaitu dari jam 8.00 pagi hingga 5.00 petang; DAN
  - c. Pengundi-pengundi **Orang Kurang Upaya (OKU)** akan mengundi di Saluran 1. Seramai **12,712 orang** pengundi OKU telah dikenal pasti dan mereka adalah berdaftar dengan Jabatan Kebajikan Masyarakat (JKM).
24. Garis Panduan Pencegahan Covid-19 bagi tujuan PRU DUN Melaka Ke-15 akan berpandukan kepada pandangan dan nasihat dari Majlis Keselamatan Negara (MKN), Kementerian Kesihatan Malaysia (KKM) dan Polis Diraja Malaysia (PDRM) dari semasa ke semasa.

Sekian dan terima kasih.

**DATUK ABDUL GHANI SALLEH**  
Pengerusi  
Suruhanjaya Pilihan Raya Malaysia (SPR)  
Tarikh : 18 Oktober 2021 / 11 Rabiulawal 1443H